

四庫全書

集部

欽定四庫全書

萬首唐人絕句卷五十五

宋 洪邁 編

七言

敬酬陸山人二首

戴叔倫

黨議連誅不可聞
直臣高士去紛紛
當時漏奪無人問
出宰東陽笑殺君

由來海畔逐樵漁
奉詔因乘使者車
却掌山中子男印

自看猶是舊潛夫

荅崔法曹賦四雪

楚僧躡雪來招隱先訪高人積雪中已別剡溪逢雪去
雪山修道與師同

撫州被推昭雪荅陸太祝三首

求理由來許便宜漢朝龔遂不為疵如今謗起翻成累
唯有新人子細知

貧交相愛果無疑共向人間聽直詞從古以來何限枉

慚知暗室不曾欺

春風旅館長庭蕪
俛首低眉一老夫
已對鐵冠窮事本
不知廷尉念冤無

送獨孤悵還京

舉家相逐還鄉去
不向秋風怨別時
湖水兩重山萬里
定知行盡到京師

臨流送顧東陽

海上獨歸慚不及
邑中遺愛定無雙
蘭橈起唱逐流去

却恨山溪通外江

行營送馬侍御

萬里羽書來未絕
五關烽火晝仍傳
故人多病盡歸去
唯有劉楨不得眠

送秦系

五都來往無舊業
一代公卿盡故人不肯低頭受羈束
遠師溪上拂纓塵

送裴判官回湖南

莫怕南風且盡歡
湘山多雨夏中寒
送君萬里不覺遠
此地曾為心鐵官

再巡道永留別

鬢下初驚白髮時
更逢離別助秋悲
從今不學四方事
已共家人海上期

別崔法曹

欲作別離西入秦
芝田棗逕往來頻
東湖此夕更留醉
逢著廬山學道人

送蕭二

擬向閒田老此身
寒郊怨別甚於春
又聞故里朋遊盡
到日知逢何處人

湘川野望

懷王獨與佞人謀
聞道忠臣入亂流
今日登高望不見
楚雲湘水各悠悠

將至道州寄李使君

九疑深路遶山回
木落天清猿晝哀
猶隔簫韶一峰在

遙傳五馬向東來

與虞沔州謁藏真上人

故侯將我到山中更上西風見遠公共問置心何處好
主人揮手指虛空

題招隱寺

昨日臨川謝病還求田問舍獨相關宋時有井如今在
却種胡麻不買山

過珥瀆單老

毫末成圍海變田單家依舊住溪邊比來已向人間老
今日相過却少年

族兄各年八十餘見招游洞

鶴髮婆娑鄉里親相邀共看往年春擬將兒女歸來住
且是茅山見老人

登高回乘月尋僧

挿鬢茱萸來未盡共隨明月下沙堆高緇寂寂不相問
醉客無端入定來

客中作

杜巖

書劔催人不斷閒洛陽羈旅復秦關
容顏歲歲愁遷改鄉國時時夢裏還

登韓公堆

崔滌

韓公堆上望秦川渺渺關山西
接連孤客一身千里外未知何日是歸年

送別

沈宇

菊黃蘆白雁初飛羌笛胡琴淚滿衣
送君腸斷秋江水

一去東流何日歸

途中

孫逖

鄴城東北望陵臺
珠翠繁華去不回
無復新粧豔紅粉
空餘故壘滿青苔

過故人宅

王喬

故人軒騎罷歸來
舊宅園林閉不開
唯餘挾瑟高堂婦
哭向平生歌舞臺

九日宴

張諤

秋葉風吹黃颯颯晴雲日照白鱗鱗
歸來得問茱萸女
今日登高醉幾人

西施石

樓穎

西施昔日浣紗津石上青苔思殺人
一去姑蘇不復返
岸傍桃李為誰春

洛第留別主人

豆盧復

客裏愁多不記春聞鶯始歎柳條新
年年下第東歸去
羞見長安舊主人

上徐中書

褚朝陽

中禁仙池越鳳凰池邊詞客紫掖郎既能作頌雄風起
何不時吹蘭蕙香

嵩山尋馮鍊師不遇

崔署

青溪訪道凌煙署王子仙成已飛去更值空山雷雨時
雲林薄暮歸何處

春旦歌

沈頌

嘗聞嬴女玉簫臺奏曲情深彩鳳來欲登此地消歸恨

却羨雙飛去不回

南中感懷

樊晃

南路蹉跎客未回
常嗟物候暗相催
四時不變江頭草
十月先開嶺上梅

怨歌

薛維翰

百尺朱樓臨狹斜
新粧能唱美人車
皆言賤妾紅顏好
要自狂夫不憶家

催粧

徐璧

傳聞燭下調紅粉明鏡臺前別作春不須滿面渾粧却
留著雙眉待畫人

古意

徐振

擾擾都城曉又昏六街車馬五侯門箕山渭水空明月
可是巢由絕子孫

落第怨刺

胡曾

翰苑何時休嫁女文昌早晚罷生兒上林新桂年年發
不許平人折一枝

寄妻

李令

有人教我向衡陽
一度思歸欲斷腸
為報艷妻兼少女
與吾覓取朗州場

贈潭州李尚書

舒元興

湘江舞罷忽成悲
便脫蠻靴出絳帷
誰是蔡邕琴酒客
魏公懷舊嫁文姬

上蔡撫州

張頂

拋却長竿卷却絲
手攜篋笠獻新詩
臨川太守清如鏡

不是漁人下釣時

商山四老

蔡京

秦末家家思逐鹿
商山四老獨忘機
如何鬢髮霜相似
更出深山定是非

蠶婦

杜荀鶴

粉色全無饑色加
豈知人世有榮華
年年道我蠶辛苦
底事渾身著苧麻

老僧二首

草屐無塵心地閒靜隨猿鳥過寒暄眼昏齒落經看過
却向僧中總不言

童子為僧今白首暗鋤心地種閒情時將舊衲添新線
披坐披行過一生

閩中秋思

雨勻紫菊叢叢色風弄紅蕉葉葉聲北畔是山南畔海
祇堪圖畫不堪行

贈僧

金定已居卷五十五
卷五十五
利門名路兩何憑
百歲風前短焰燈
只恐為僧僧不了
為僧得了盡輸僧

溪興

山雨溪風卷釣絲
瓦甌篷底獨斟時
醉來睡著無人喚
沉下前灘也不知

過巢湖

世人貪利復貪榮
來向湖邊始至誠
男子登舟與登陸
把心何不一般行

傷硤石縣病叟

無子無孫一病翁，將何筋力事耕農。
官家不管蓬蒿地，須隔王租出此中。

溪岸秋思

桑柘窮頭三四家，
挂罾垂釣是生涯。
秋風忽起溪浪白，
零落岸邊蘆荻花。

春日旅寓

滿城羅綺拖春色，
幾處笙歌揭畫樓。
江上有家歸未得，

眼前花是眼前愁

秋夕二首

世間多少能詩客
誰是無愁得睡人
自我夜來霜月下
到頭吟魄始終身

壞屋不眠風雨夜
故園無信水雲秋
病中枕上誰相問
一一蟬聲槐樹頭

田翁

白髮星星筋力衰
種田猶自伴孫兒
官苗若不平平納

任是豐年也受饑

秋江雨夜逢詩友

故友別來三四載
新詩吟得百餘篇
夜來江上秋無月
恨不相逢在雪天

感春

無況青春有恨身
眼前花似夢中春
浮生七十今三十
已是人間半世人

宿欒城驛却寄常山張書記

一更更盡到三更吟破離心句不成數樹秋風滿庭月
憶君時復下階行

湘江秋夕

三秋月色三湘水浸骨寒光似練鋪一夜塞鴻來不住
故鄉書信半年無

贈崔道士

四海兵戈無靜處人家廢業望烽煙九華道士渾如夢
猶向尊前笑揭天

題道林寺

身未立間終日苦身當立後幾年榮萬般不及僧無事
共水將山過一生

旅懷二首

薰葭月冷時聞雁楊柳風和日聽鶯水涉山行二年客
就中偏怕雨船聲

月華星采坐來收嶽色江聲暗結愁半夜燈前十年事
一時和雨到心頭

經嚴陵釣臺

蒼翠雲峰開俗眼
泓澄煙水浸塵心
唯將道業為芳餌
釣得高名直至今

關試後筵上別同人

日午離筵到夕陽
明朝秦地與吳鄉
同年多是長安客
不信行人欲斷腸

新雁

暮天新雁起汀洲
紅蓼花疎水國秋
想得故園今夜月

幾人相憶在江樓

自遣

糲食羸衣隨分過堆金積帛欲如何百年身後一邱土
貧富高低爭幾多

子規

楚天空濶月成輪蜀魄聲聲似告人啼得血流無用處
不如緘口過殘春

贈質上人

欽定四庫全書

萬首唐人絕句
卷五十五

十三

耕坐雲遊出世塵
魚無瓶鉢可隨身
逢人不說人間事
便是人間無事人

秋夜苦吟

吟盡三更未著題
竹風松雨共淒淒
此時若有人來聽
始覺巴猿不解啼

秋夜聞砧

荒涼客舍眠秋色
砧杵家家弄月明
不及巴山聽猿夜
三聲中有不愁聲

上東川楊尚書二首

柳宗

莫言名位未相儔
風月何曾阻獻酬
前輩不須輕後輩
靖安今日在衡州

答楊尚書

未向燕臺逢厚禮
幸因社會接餘歡
一魚喫了終無恨
鯤化成鵬也不難

為松滋令贈副戎

南卓

翱翔曾在玉京天
墮落江南路幾千
從事不須輕縣宰

滿身猶帶御爐煙

詠和親

蘇郁

關月夜懸青塚鏡
塞雲秋薄漢宮羅
君王莫信和親策
生得羣雛敵更多

鸚鵡詞

莫把金籠閉鸚鵡
箇箇分明解人語
忽然更向君前語
三十六宮愁幾許

詠燕上主司

歐陽澥

翩翩雙燕畫堂開
送古迎今幾萬回
長向春秋社前後
為誰歸去為誰來

獻盧梓州

萬彤雲

荷衣拭淚幾回穿
欲謁朱門抵上天
不是尚書輕下客
山家無物與王權

戲游夔州

盧子發

白帝城頭二月時
忍交清醒看花枝
莫言世上無袁許
客子由來是相師

詠蟹

皮日休

未游滄海早知名有骨還從肉上生
莫道無心畏雷電海龍王處也橫行

金錢花

陰陽為炭地為爐鑄出金錢不用模
莫向人前逞顏色不知還解濟貧無

醉題廣州使院

鄭愚

數年百姓受飢荒太守貪殘似虎狼
今日海隅魚米賤

大須慚愧石留黃

題僊娥驛

李日新

商山食店大悠悠
陳黠餽古餘頭更有壽
終牛肉炙當盤數
巒紫光毬

戲張祜

朱沖和

白在東都元已薨
蘭臺鳳閣少人登
冬瓜堰下逢張祜
牛屎堆邊說我能

戲題盱眙壁

韋鵬翼

豈肯閒尋竹徑行却嫌絲管好蛙聲自從煮鶴燒琴後
背却青山卧月明

戲示諸妓

張保嗣

綠羅裙上標三棒紅粉腮邊淚兩行抄手向前咨大使
這回不敢惱免郎

上浙東孟尚書

孔融

有箇將軍不得名唯教健卒喝書生尚書治化清如鏡
天子官街不許行

翻韻贈崔漳州

黎瓘

慣向溪邊折楊柳因循行客到州漳無端觸忤王衙押
不得今朝看飲鄉

春恨三首

錢珣

負罪將軍在北朝秦淮芳草綠迢迢高臺愛妾魂消盡
始倚丘遲為一招

久戍臨洮報未歸篋香消盡別時衣身輕願比蘭階蝶
萬里還尋塞草飛

永巷頻聞小苑游，舊恩如淚亦難收。
君前願報新顏色，團扇須防白露秋。

蜀國偶題

忽憶明皇西幸時，暗傷潛恨竟誰知。
佩蘭應語官臣道，莫向金盤進荔枝。

未展芭蕉

冷燭無烟綠蠟乾，芳心猶卷怯春寒。
一緘書札藏何事，會被東風暗折看。

奉和韓晉公晦日

顧況

江南無處不聞歌
晦日中軍樂更多
不是風光催柳色
却緣威令動陽和

悲歌四首

我欲昇天隔霄漢
我欲渡水水無橋
我欲上山山路險
我欲汲水水泉遙

越人翠被今何寂
獨立江邊沙草碧
紫燕西飛欲寄書
白雲何處逢來客

新結青絲百尺繩
心在君家轆轤上
我心皎潔君不知
轆轤一轉一惆悵

何處風光驚曉幕
江南綠水通朱閣
美人二八顏如花
泣向春風畏花落

催粧

盧儲

昔年將去玉京遊
第一仙人許狀頭
今日幸為秦晉會
早教鸞鳳下粧樓

獻淮南帥


李嶸

雞樹烟含瑞氣凝鳳池波待玉山澄國人久倚東關望
擬築沙堤到廣陵

勸少年

李錡

勸君莫惜金縷衣勸君須惜少年時有花堪折直須折
莫待無花空折枝



萬首唐人絕句卷五十五

欽定四庫全書

集部

萬首唐人絕句卷五十六至

詳校官庶吉士臣柳邁祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷五十六

宋 洪邁 編

七言

有感

司空圖

國事皆須救未然
漢家高閣漫凌烟
功臣盡遣詞人贊
不省滄洲畫魯連

歌

處處亭臺只壞牆軍營人學內人糝太平故事因君唱
馬上曾聽隔教坊

偈

人若憎時我亦憎逃名最要是無能後生乞汝殘風月
自作深林不語僧

鷓鴣

不是流鶯獨占春林門綠翠四時新應知擬上屏風畫
偏坐橫枝亦向人

白菊雜書四首

黃昏寒立更披襟
露浥清香悅道心
却笑誰家扃繡戶
正薰龍麝暖鴛衾

四面雲屏一帶天
是非斷得自翛然
此生只是償詩債
白菊開時最不眠

狂才不足自英雄
僕妾驅令學販舂
侯印幾人封萬戶
儂家只辦買孤峰

黃鸝轉處誰同聽
白菊開時且剩過
漫道南朝足流品

由來叔寶不宜多

漫題

經亂年年厭別離
歌聲喜似太平時
詞臣更有中興頌
磨取蓮峰便作碑

率題

官路前銜閒不記
醉鄉佳境興方濃
一林高竹長遮日
四壁寒山更閨冬

礪戶

礪戶芳煙接水村
亂來歸得道
仍存數竿新竹
當軒上
不羨侯家立戟門

故鄉杏花

寄花寄酒喜新開
左把花枝右把杯
欲問花枝與杯酒
故人何得不同來

華下二首

故國春歸未有涯
小欄高檻別人家
五更惆悵回孤枕
猶自殘燈照落花

關外風昏欲雨天
薺花耕倒枕河壩
村南寂寞時回望
一隻鴛鴦下渡船

夢中

幾多親愛在人間
上徹霞梯會却還
須是蓬瀛長買得
一家同占作家山

榜下

三十功名志未伸
初將文字競通津
春風漫折一枝桂
煙閣英雄笑殺人

泮陽渡

楚田人立帶殘暉驛迥村幽客路微
兩岸蘆花正蕭颯
渚煙深處白牛歸

偶作

索得身歸未保閒亂來道在辱來頑
留侯萬戶雖無分
病骨應消一片山

寓居有感三首

亦知世路薄忠貞不忍殘年負聖明
只待東封沾慶賜

碑陰別刻老臣名

不放殘年却到家
銜杯懶更問生涯
河堤往往人相送
一曲晴川隔蓼花

黑鬚寄在白鬚生
一度秋風減幾莖
客處不堪頻送別
無多情緒更傷情

淮西

鼇冠三山安海浪
龍盤九鼎鎮皇都
莫誇十萬兵威盛
消箇忠良効順無

河湟有感

一自蕭關起戰塵
河湟隔斷異鄉春
漢兒盡作蕃兒語
却向城頭罵漢人

自邛鄉北歸

巴煙幕幕久縈恨
楚柳綿綿今送歸
回避江邊同去雁
莫教驚起錯南飛

青龍師安上人

災曜偏臨許國人
雨中衰菊病中身
清香一炷知師意

應為昭陵惜老臣

山中

凡鳥愛喧人靜處
閒雲似妬月明時
世間萬事非吾事
只愧秋來未有詩

有感二首

自古經綸足是非
陰謀最忌奪天機
留侯却粒高翁去
甲第何人意氣歸

古來賢俊共悲辛
長是豪家拒要津
從此當歌唯痛飲

不須經世為閒人

閒夜二首

道侶難留為虐基鄰家聞說厭吟詩
前峰月照分明見夜合香中露卧時

此身閒得易為家業是吟詩與看花
若使他生拋筆硯更應無事老煙霞

雨中

維摩居士陶居士盡說高情未足誇
簷外蓮峰塔下菊

碧蓮黃菊是吾家

送道者二首

洞天真侶昔曾逢
西嶽今居第幾峰
峰頂他時教我認
相招須把碧芙蓉

殷勤不為學燒金
道侶惟應識此心
雪裏千山訪君易
微微鹿迹入深林

重陽阻雨

重陽阻雨獨銜杯
移得家山菊未開
猶勝登高閒望斷

孤煙殘照馬嘶回

省試

粉闥深鎖唱同人正是終南雪霽春
閒繫長安千匹馬
今朝似減六街塵

有贈

有詩有酒有高歌春色年年奈我何
試問羲和能駐否
不勞頻借魯陽戈

證因亭

金史曰 卷三十三
卷五十六
峰北幽亭願證因他生此地却容身上方僧在時應到
笑認前銜記寫真

頃年陪恩地赴甘棠之名感動留題

去時憔悴青衿在歸路淒涼絳帳空無限酬恩心未展
又將孤劍別從公

九月八日

己是人間寂寞花解憐寂寞傍貧家老來不得登高看
更甚殘春惜歲華

歙溪橋院有感

昔歲攀游景物同，藥爐今在鶴歸空。
青山滿眼淚堪碧，絳帳無人花自紅。

寺閣

昔歲登臨未衰頹，不知何事愛傷情。
今來攬鏡翻堪喜，亂後霜鬚長幾莖。

武陵路

橘岸舟閒罾網掛，茶坡日暖鷓鴣啼。
女郎指點行人笑。

知向花間路已迷

南北史感遇十首

雨淋麟閣名臣畫
雪卧龍庭猛將碑
不用黃金鑄侯印
盡輸公子買蛾眉

漢世頻封萬戶侯
雲臺空峻謝風流
江南不有名儒相
齒冷中原笑未休

天風幹海怒長鯨
永固南來百萬兵
若向滄洲猶笑傲
江山虛有石頭城

花迷公子玉樓恩
鏡弄佳人紅粉春
不信關山勞遠戍
綺羅香外任行塵

兵圍梁殿金甌破
火發陳宮玉樹摧
姦佞豈能慚誤國
空令懷古更裴回

行樂最宜連夜景
太平方覺有春風
千金盡把酬歌舞
猶勝三邊賞戰功

桃芳李艷年年發
羌管蠻弦處處多
海上應無三島路
人間惟有一聲歌

佳人自折一枝紅，把唱新詞曲未終。
惟向眼前憐易落，不如拋擲任春風。

景陽樓下花鈿鏡，玄武湖邊錦繡旗。
昔日繁華今日恨，雉媒聲晚草芳時。

亂後人間盡不平，秦川花木最傷情。
無窮紅艷紅塵裏，驟馬分香散入營。

狂題二首

草堂舊隱猶招我，煙閣英才不見君。
惆悵故山歸未得。

酒狂叫斷暮天雲

須知世亂身難保
莫喜天晴菊併開
長短此身長是客
黃花更助白頭催

紅茶花

景物詩人見即誇
豈憐高韻說紅茶
牡丹枉用三春力
開得方知不是花

秋燕

從撲香塵拂面飛
憐渠只為解相依
經冬好近深爐暖

何必千巖萬水歸

見後鴈有感

笑爾窮通亦似人高飛偶滯莫悲辛却緣風雪頻相阻
只向關中待得春

移挑栽

獨臨官路易傷摧從遣春風恣意開禪客笑移山上看
流鶯直到檻前來

憶中條

燕辭旅舍人空在
螢出踈籬菊正芳
堪恨昔年聯句地
念經僧掃過重陽

樂府

五更窻下簇耕臺
已怕堂前阿母催
滿鴨香薰鸚鵡睡
隔簾燈照牡丹開

放龜二首

却為多知自不靈
今朝教汝卜長生
若求深處無深處
只有依人會有情

世外猶迷不死庭
人間莫恃自無營
本期滄海堪投迹
却向朱門待放生

燈花三首

蜀柳絲絲幕畫樓
塵滿鏡不梳頭
幾時金鴈傳歸信
剪斷香魂一縷愁

姊姊教人且抱兒
逐他女伴卸頭遲
明朝鬪草多應喜
剪得燈花自掃眉

閨前小雪過經旬
猶自依依向主人
開盡菊花憐強舞

與教弟子待新春

偶題三首

浮世悠悠旋一空，多情偏解挫英雄。
風光只在歌聲裏，不必樓前萬樹紅。

小池隨事有風荷，燒酎傾壺一曲歌。
欲待秋塘擎露看，自憐生意已無多。

遼陽音信近來稀，縱有虛傳逼節歸。
永日無人新睡覺，小牕晴暖蛭蟲飛。

華下對菊

清香裛露對高齋
泛酒偏能浣旅懷
不似春風逞紅艷
鏡前空墜玉人釵

與都統叅謀書有感

驚鷺迸鷺盡歸林
弱羽低垂分獨沈
帶病深山猶草檄
昭陵應識老臣心

漫題

無官無名拘逸興
有歌有酒任他鄉
看看萬里休征戍

莫向新詞寄斷腸

商山二首

清溪一路照羸身不似雲臺畫像人
國史數行猶有志只將談笑繼英塵

馬上搜竒已數篇籍中猶愧是頑僊
關頭傳說開元事指點多疑孟浩然

與伏牛長老偈二首

不算菩提與闡提惟應執著便生迷
無端指箇清涼地

凍殺西僧雪嶺西

長繩不見繫空虛
半偈傳心亦未疎
推倒我山無一事
莫將文字縛真如

客中重九

楚老相逢淚滿衣
片名薄宦已知非
他鄉不似人間路
應共東流更不歸

柳二首

誰家按舞傍池塘
已見繁枝嫩眼黃
漫說早梅先得意

不知春力暗分張

似擬凌寒妬早梅無端弄色傍高臺折來未有新枝長
莫遣佳人更折來

光啟丁未別山

草堂琴畫已判燒猶託鄰僧護燕巢此去不緣名利去
若逢逋客莫相嘲

石楠

客處偷閒未是閒石楠雖好懶頻攀如何風葉西歸路

吹斷寒雲見故山

力疾上馬走筆

釀黍長添不盡杯
只憂花盡客空回
垂楊且為晴遮日
留遇重陽即放開

華陰縣樓

丹霄能有幾層梯
懶更揚鞭聳翠蜺
偶凭危欄且南望
不勞高掌欲相攜

南至四日

今冬臘後無殘日故國燒來有幾家却恨早梅添旅思
強偷春力報年華

花時不是偏愁我好事應難總取他已被詩魔長役思
眼中莫厭早梅多

年華亂後偏堪惜世路拋來已自生猶有玉真長命縷
罇前時唱緩羈情

一任喧闐遠四鄰閒忙皆是自由身人來客去還須議
莫遣他人作主人

蓮峯前軒

人間上壽若能添
只向人間也不嫌
看著四鄰花競發
高樓從此莫垂簾

步虛

阿母親教學步虛
三元長遣下蓬壺
雲韶韻俗傳瑤瑟
鸞鶴飛低拂寶壺

劍器

樓下公孫昔擅場
空教女子愛軍裝
潼關一敗蕃兒喜

簇馬驪山看御湯

乙丑人日

自怪扶持七十身歸來又見故鄉春
今朝人日逢人喜
不料偷生作老人

攜仙錄九日

嶽北秋空渭北川晴雲漸薄薄如煙
坐來還見微風起
吹散殘陽一片蟬

一半晴空一半雲遠籠仙掌日初曛
洞天有路不知處

絕頂異香難更聞

決事還須更事酬清譚妙理一時休
漁翁亦被機心誤
眼暗汀邊結釣鉤

迹不趨時分不侯功名身外最悠悠
聽君總畫麒麟閣
還我閒眠舴艋舟

仙凡路阻兩難留煙樹人間一片秋
若道陰功能濟活
且將方寸自焚修

若有陰功救未然玉皇品籍亦搜賢
應知譚笑還高謝

別就滄洲贊上仙

英名何用苦搜竒不朽才銷一句詩却賴風波阻三島
老臣猶得戀明時

剪取紅雲刺寫詩年年高會趁花時水精樓閣分明見
只欠霞漿別著旗

此生得作太平人只向塵中便出塵移取碧桃花萬樹
年年自樂故鄉春

浪淘沙

不必長漂玉洞花
曲中偏愛浪淘沙
黃河却勝天河水
萬里縈紆入漢家

萬首唐人絕句卷五十六

欽定四庫全書

萬首唐人絕句卷五十七

宋 洪邁 編

七言

狂題一十八首

司空圖

莫恨艱危日日多時情其奈倖門何
貔貅睡穩蛟龍渴
猶把殘燒朽鐵磨

別鶴淒涼指法存戴逵能恥近王門
世間第一風流事

借得王公玉枕痕

交疎自古戒言深
肝膽徒傾致鏤金
不是史遷書與說
誰知孤負李陵心

南華落筆似荒唐
若肯經綸亦不狂
偶作客星侵帝座
却應虛薄是嚴光

不勞世路更相猜
忍到須休惜得材
幾度懶乘風水便
拗船折舵恐難回

由來相愛只詩僧
怪石長松自得朋
却怕他生還識字

依前月下作孤燈

老禪剝仗莫過身遠岫孤雲見亦頻應是佛邊猶怕鬧
信緣須作且閒人

止竟閒人不愛閒只偷無事閉柴關轟霆攪破蛟龍窟
也被狂風卷出山

地下修文著作郎生前饑處倒空牆何如神爽騎星去
猶自研幾助玉皇

雨洗芭蕉葉上詩獨來凭檻晚晴時故園雖恨風荷膩

新句閒題亦滿池

初時拄杖向鄰村漸到清明亦杜門三十年來辭病表
今朝卧病感皇恩

來時雖恨失青氈白見芭蕉幾十篇應是阿劉還宿債
剩拚才思折供錢

芭蕉叢畔碧嬋娟更悠悠擾蜀川應到去時題不盡
不勞分寄校書牋

自傷衰病漸難平永夜單牀雨滴聲聞道虎瘡仍帶鏃

吼來和痛亦橫行

昨日流鶯今日蟬起來又是夕陽天
六龍飛轡長相窘
更忍乘危自著鞭

有是有非還有慮無心無跡亦無猜
不平便激風波險
莫向安時稔禍胎

十年三署讓官頻認得無才又索身
莫道太行同一路
大都安穩屬閒人

曾聞劫火到蓬壺縮盡鰲頭海亦枯
今日家山同此恨

人歸未得鶴歸無

遊仙二首

蛾眉新畫覺嬋娟
鬪走將花阿母邊
仙曲教成慵不理
玉階相簇打金錢

劉郎相約事難諧
雨散雲飛自此乖
月姊殷勤留不住
碧空遺下水精釵

漫書五首

長擬求閒未得閒
又勞行役出秦關
逢人漸覺鄉音異

却恨鶯聲似故山

溪邊隨事有桑麻
盡日山程十數家
莫怪行人頻悵望
杜鵑不是故鄉花

海山昔聞麋愛鶴
山中今見鹿憎龜
愛憎止竟須闕分
莫把微才望所知

世路快心無好事
恩門嘉話合書紳
神藏鬼伏能千變
亦勝忘機避要津

四翁識勢保安閒
須為生靈暫出山
一種老人能筭度

磻溪心跡愧商顏

偶詩五首

閒韻雖高不銜才
偶拋猿鳥乍歸來
夕陽照箇新紅葉
似要題詩落硯臺

芙蓉騷客空留怨
芍藥詩家只寄情
誰似天才李山甫
牡丹屬思亦縱橫

賢豪出處盡沉吟
白日高懸只照心
一掬信陵墳上土
便如碣石累千金

聲貌由來固絕倫
今朝共許占殘春
當歌莫怪頻垂淚
得地翻慚早失身

中宵茶鼎沸時驚
正是寒窻竹雪明
甘得寂寥能到老
一生心地亦應平

雜題二首

先知左袒始同行
須待龍樓羽翼成
若使只憑三傑力
猶應漢鼎一毫輕

魚在枯池鳥在林
四時無奈雪霜侵
若教激勸田真宰

亦獎青松徑寸心

光化踏青有感

引得車回莫認恩却成寂寞與誰論
不是君王意羞插垂楊更傍門

丑年冬

醉日昔聞都下酒何如今喜折新茶不堪病渴仍多慮
好向灩湖便出家

白菊三首

人間萬恨已難平
裁得垂楊更繫情
猶喜閨前霜未下
菊邊依舊舞身輕

莫惜西風又起來
猶能婀娜傍池臺
不辭暫被霜寒挫
舞袖招香即却回

為報繁霜且莫催
窮秋須到自低垂
橫拖長袖招人別
只待春風却舞來

扇

珍重逢秋莫棄捐
依依只仰故人憐
有時池上遮殘日

承得霜林幾箇蟬

修史亭三首

山前鄰叟去紛紛，獨強衰羸愛杜門。
漸覺一家看冷落，地爐生火自溫存。

甘心七十且酣歌，自筭平生幸已多。
不似香山白居易，晚將心地著禪魔。

烏紗巾上是青天，檢束酬知四十年。
誰料平生學鷹手，挑燈自送佛前錢。

力疾山下吳村看杏花十九首

春來漸覺一川明
馬上繁花作陣迎
掉臂只將詩酒敵
不勞金鼓助橫行

閩闔曾排捧御爐
猶看曉月認金鋪
羸形不畫凌煙閣
只為微才激壯圖

鏡留雪鬢暖消無
春到梨花日又晡
移取扶桑塔下種
年年看長礙金烏

折來未盡不須休
年少爭來莫與留
更願狂風知我意

一時吹向海西頭

才情百巧鬪風光却笑雕花刻葉忙
熨帖新巾來與裹猶看騰踏少年場

浮世榮枯總不知且憂花陣被風欺
儂家自有麒麟閣第一功名只賞詩

白衫裁袖本教寬朱紫由來亦一般
王老小兒吹笛者我儂試舞兩儂看

單牀薄被又羈棲待到花開亦甚迷
若道折多還有罪

只應鶯囀是金雞

近來桃李半燒枯
歸卧鄉園只老夫
莫笑明年人在否
不知花得更開無

漢王何事損精神
花滿深宮不見春
穠艷三千臨粉鏡
獨悲掩面李夫人

能艷能芳自一家
勝鸞勝鳳勝煙霞
客來須共醒醒看
碾盡明昌幾角茶

造化無端欲自神
裁紅剪翠為新春
不如分減閒心力

更助英豪濟活人

裴回自勸莫沾纓
分付年年谷口鶯
却賴無情容易別
有情早箇不勝情

閒步偏宜舞袖迎
春光何事獨無情
垂揚合是詩家物
只向敷溪道北生

亦知王大是昌齡
杜二其如律韻情
還有酸寒堪笑處
擬誇朱紱更崢嶸

潘郎愛說是詩家
枉占河陽一縣花
千載幾人搜警句

補方金字愛情霞

行樂溪邊步轉遲
出山漸減探花期
去今四度今三度
恐到憑人折去時

此身衰病轉堪嗟
長忍春寒獨惜花
更恨新詩無紙寫
蜀牋堆積是誰家

昨日黃昏始看回
夢中相約又啣杯
起來聞道風飄却
猶擬教人掃取來

少儀

欽定四庫全書

昨日登班綴柏臺更慚起草屬微才錦窠不是尋常錦
兼向丘遲奪得來

重陽四首

簷前減燕菊添芳燕盡庭前菊又荒老大比他年少
每逢佳節更悲涼

雨寒莫待菊花催須怕晴空暖併開開却一枝開却盡
且隨幽蝶更裴徊

青娥懶唱無衣換黃菊新開乞酒難長有長亭惆悵事

隔河更得對憑欄

白髮怕寒梳更懶
黃花晴日照初開
籬頭應是蝶相報
已被鄰家攜酒來

長命縷

他鄉處處堪悲事
殘照依依惜別天
此去知名長命縷
殷勤為我唱花前

柏東

真得機心豈在僧
柏東閒步愛騰騰
免教世路人相忌

逢着村醪亦不惜

歌者十二首

追逐翻嫌傍管弦
金釵擊節自當筵
風霜一夜燕鴻斷
唱作江南袂褱天

玉樹花飄鳳失棲
一聲初壓管弦低
清回煩暑成瀟灑
艷逐寒雲變慘悽

十斛明珠亦易拚
欲兼人藝古來難
五雲合是新聲染
鎔作瓊漿灑露盤

不似新聲唱亦新
旋調玉管旋生春
愁腸隔斷珠簾外
只為今宵共聽人

十年逃難別雲林
暫輟狂歌却聽琴
轉覺淡交言有味
此聲知是古人心

五柳先生自識微
無絃共笑手空揮
胷中免被風波撓
肯為蟾螂動殺機

風霜寒水旅人心
幾處笙歌繡戶深
分泊一場雲散後
未勝初夜便聽琴

自憐眼暗難求藥莫恨花繁便有風桃李更開須強看
明年兼恐聽歌聲

白雲深處寄生涯歲暮生情賴此花蜂蝶繞來忙繞袖
似知教折送隣家

重九仍重歲漸闌強開病眼更登攀年年認得酣歌處
猶恐招魂葬故山

繞壁依稀認寫真更須粉飾羸身淒涼不道身無壽
九日還無舊會人

鶴氅花香搭槿籬枕前蛩迸酒醒時夕陽似照陶家菊
黃蝶無窮壓故枝

題裴晉公華嶽廟題名

岳前大隊赴淮西從此中原息鼓聲石闕莫教苔蘚上
分明認取晉公題

揚柳枝壽盃詞十八首

樂府翻來占太平風光無處不含情千門萬戶喧歌吹
富貴人間只此聲

卷五十七
撼晚梳空不自持與君同折上樓時春風還有常情處
繫得人心免別離

灞亭東去徹隋堤贈別何須醉似泥萬里往來無一事
便帆輕拂亂鶯啼

臺城細仗曉初移詔賜千官襖飲時綠帳遠籠清珮響
更曛晴日上龍旗

桃源仙子不須誇聞道惟栽一片花何似浣紗溪畔住
綠陰相間兩三家

偶然樓上捲珠簾
徃徃長條拂枕函
恰值小娥初學舞
擬偷金縷押春衫

池邊影動散鴛鴦
更引微風亂繡牀
直待玉窻塵不起
始應金鴈得成行

稻畦分影向江村
憔悴經霜只半存
昨日流鶯今不見
亂螢飛出照黃昏

客淚休沾漢水濱
舞腰羞殺漢宮人
狂風更與回煙幕
掃盡繁花獨占春

金少卿集卷之二十七
卷五十七
遊人莫歎易凋衰長樂榮枯自有期
看取明年春意動更於何處最先知

昔年行樂及芳時一上丹梯挂一枝
笑問江頭醉公子饒君滿把麴塵絲

渡頭殘照一行新獨自依依向北人
莫恨故鄉千里遠眼中從此故鄉春

絮惹輕枝雪未飄小溪煙束帶危橋
鄰家女伴頻攀折不覺回身冒翠翹

處處榮空百萬枝
一枝枝好更題詩
隔城遠岫招行客
便與朱樓當酒旗

錦城分得映金溝
兩岸年年引勝遊
若似松篁須帶雪
人間何處認風流

日暖津頭絮已飛
看看還是送春歸
莫言萬緒牽愁思
緝取長繩繫落暉

大堤時節近清明
霞襯煙籠遠郡城
好是梨花相映處
更勝松雪日初晴

聖主千年樂未央御溝金翠滿垂楊年年織作昇平字
高映南山獻壽觴

山鵲

多驚本為好毛衣只賴人憐始却歸衆鳥自知顏色減
妬他偏向眼前飛

李居士

高居只在五峰前應是精靈降作賢萬里無雲惟一鶴

鄉中同看却昇天

靈一作星

萬首唐人絕句

萬首唐人絕句

十五

萬首唐人絕句卷五十七

欽定四庫全書

萬首唐人絕句卷五十八

宋 洪邁 編

七言

暮春對柳二首

司空圖

縈愁惹恨奈楊花
閉戶垂簾亦滿家
惱得閒人作酒病
剛須又撲越溪茶

洞中猶說看桃花
輕絮狂飛自俗家
正是階前開遠信

小娥旋拂碾新茶

戊午三月晦二首

隨風逐浪劇蓬萍
圓首何曾解最靈
筆硯近來多自棄
不關妖氣暗文星

牛誇碁品無勅敵
謝占詩家作上流
豈似小敷春水漲
年年鸞鶴待仙舟

偶書五首

情知了得未如僧
客處高樓莫強登
鶯也解啼花也發

不關心事最堪憎

自有池荷作扇搖不關風動愛芭蕉只憐直上抽紅藻
似我丹心向本朝

曾看輕舟渡遠津無風着岸不經旬只緣命蹇須知命
却是人爭阻得人

上谷何曾解有情有情人自惜君行證因池上今生願
的的他生作化生

新店南原後夜程黃河風浪信難平渡頭楊柳知人意

為惹官船莫放行

喜山鵲初歸三首

翠衿紅嘴便知機
久避重羅穩處飛
只為從來偏護惜
窻前今賀主人歸

山中只是惜珍禽
語不分明識爾心
若使解言天下事
燕臺今築幾千金

阻他羅網到柴扉
不奈偷倉雀轉肥
賴爾林塘添景趣
剩留山果引教歸

虞鄉北原

澤北村貧煙火穉稚田冬早倩牛耕老人惆悵逢人訴
開盡黃花麥未金

洛中三首

秋風團扇未驚心笑看粧臺落葉侵繡鳳不教金縷暗
青樓何處有寒砧

不用頻嗟世路難浮生各自繫悲懼風霜一夜添羈思
羅綺誰家待早寒

燕巢空後誰相伴
鴛被縫來不忍薰
薄命敢辭長滴淚
倡家未必肯留君

寓筆

年年鑷鬢到花飄
依舊花繁鬢易凋
撩亂一場人更恨
春風誰道勝輕颿

戲題試衫

朝班盡說人宜紫
洞府應無鶴着緋
從此玉皇須破例
染霞裁賜地仙衣

汴柳半枯因悲柳中隱

行人莫歎前朝樹已占河堤幾百春惆悵題詩柳中隱
柳衰猶在自無身

上方

花落更同悲木落鶯聲相續即蟬聲榮枯了得無多事
只是閒人漫繫情

寄王贊學

黃卷不闌兼濟美青山自保老閒身一行萬里織塵靜

可要張儀更入秦

新節

轉悲新歲重於山不似輕鷗肯復還
朱紱縱教金印換青雲未勝白頭閒

自河西歸山二首

一水悠悠一葉危往來長恨阻歸期
鄉闈不是無華表自為多驚獨上遲

水濶風驚去路危孤舟欲上更遲遲
鶴羣長繞三珠樹

不借閒人一隻騎

王官二首

風荷似醉和花舞
沙鳥無情伴客閒
總是此中皆有恨
更堪微雨半遮山

荷塘煙罩小齋虛
景物皆宜入畫圖
盡日無人只高卧
一雙白鳥隔紗櫺

賀翰林侍郎二首

太白東歸鶴背吟
鏡湖空在酒船沉
今朝忽見銀臺事

早晚重徵入翰林

玉版徵書洞裏看
沈羲新拜侍郎官
文星喜氣連台曜
聖主方知四海安

寄三十三舍人

幾年汶上約同遊
擬為蓮峰別置樓
今日鳳凰池畔客
五千仞雪不回頭

綸閣有感

風濤曾阻化鱗來
誰料蓬瀛路却開
欲去遲遲還自笑

狂才應不是仙才

寄薛起居

小域新銜賀聖朝亦知蹇分巧難拋
麤才自合無岐路
不破工夫漫解嘲

古宮怨

王建

亂鳥啞啞飛復啼
宮頭晨夕宮中棲
吳王別殿繞江水
後宮不開美人死

祝鵲

神鵲神鵲好言語行人早回多利賈我今庭中栽好樹
與汝作巢當報汝

海人謠

海人無家海裏住採珠殺象為歲賦惡波橫天山塞路
未央宮中常滿庫

兩頭織織

兩頭織織青玉玦半白半黑頭上髮膈膈膊春冰裂
磊磊落落桃花結

看碁

彼此抽先局勢平
傍人道死的還生
兩邊對坐無言語
盡日時聞下子聲

設酒寄獨孤少府

自看和釀一依方
緣看松花色較黃
不分君家新酒熟
好詩叔得被回將

新授戒尼師

新短方裙疊作稜
聽鐘洗鉢繞青蠅
自知戒相分明後

先出壇場禮大僧

于宅看花

小葉稠枝粉壓摧
暖風吹動鶴翎開
若無別事為留難
拋却貧家宿看來

元太守同遊七泉寺

盤磴迴廊古塔深
紫芝紅藥入雲尋
晚吹簫管秋山裏
引得獼猴出象林

望定州寺

回看佛閣青山半
三四年前到上頭
省得老僧留不住
重尋可更有因由

道中寄杜書記

西南東北暮天斜
巴字江邊楚樹花
珍重荊州杜書記
閒時多在廣師家

聽琴

無事此身離白雲
松風溪水不曾聞
至心聽着仙翁引
今看青山圍繞君

贈陳評事

識君雖向歌鐘會說事不離雲水間
春夜酒醒長起坐
燈前一紙洞庭山

寄畫松僧

天香寺裏古松僧不畫枯松落石層
最愛臨江兩三樹
水禽棲處解無藤

花褐裘

對織芭蕉雪毳新長縫雙袖窄裁身
到頭須向邊城著

消殺秋風稱獵麀

夜看美人宮綦

宮綦布局不依經黑白分明子數停
巡拾玉沙天漢曉猶殘織女兩三星

上田僕射

一方新地隔河煙曾接諸生聽管弦
却憶去年寒食會看花猶在水堂前

樓前

天寶年前勤政樓每年三日作韁鞞飛龍老馬曾教舞
聞着音聲忽舉頭

聽雨

半夏思家睡裏愁雨聲落落屋簷頭照泥星出依前黑
淹爛庭花不肯休

冬至後招于秀才

日近山紅暖氣新一陽先入御溝春聞閒立馬重來此
沐浴明年稱意身

送人歸丹陽

江城柳色海門煙，欲到茅山始下船。
知道君家當瀑布，芑蒲潭在草堂前。

春早聞鶯

侵黑行飛一兩聲，春寒轉小未分明。
若教更解諸餘語，應向宮花不惜情。

題石甕寺

天宮連內繞丹巖，塵蓋雲間落數帆。
遙指上皇翻曲處，

百官題字滿西嵌

寄張博士

春明門外作卑官
病友經年不得看
莫道長安近于日
升天却易到城難

太和公主和蕃

塞黑雲黃欲渡河
風沙眯眼雪相和
琵琶淚濕行聲小
斷得人腸不在多

舊宮人

先帝舊宮宮女在亂絲猶插鳳凰釵霓裳法曲渾拋却
獨自花間掃玉階

新晴後

夏夜新晴星較少雨收殘水入天河簷前着熱衣裳坐
風冷渾無撲火蛾

寄薛濤校書

萬里橋邊女校書琵琶花裏寄閒居掃眉才子無多少
管領春風總不如

長門燭

秋夜牀前蠟燭微
銅壺滴盡曉鐘遲
殘光欲滅還吹着
年少宮人不睡時

樂府辭二十五首

伊州歌五首

蓋嘉運

秋風明月獨離居
蕩子從戎十載餘
征人去日殷勤囑
歸雁來時數寄書

彤闈曉闕萬鞍回
玉輅春遊薄晚開
渭北清光搖草樹

南洲佳景入樓臺

千門今夜曉初晴萬里天河徹帝京
燦燦繁星駕秋色
稜稜霜氣韻鐘聲

長安二月柳依依西出流沙路漸微
闕氏山上春光少
相府邊廷驛使稀

三秋大漠冷溪山八月嚴霜變草顏
捲旆風行宵渡磧
銜枚電掃曉應還

捉拍睦州

西去輪臺萬里餘故鄉音耗日應踈隴山鸚鵡能言語
為報閨人數寄書

水調歌七首

平沙落日大荒西隴上明星高復低孤山幾處看烽火
壯士連營候鼓鼙

猛將關西意氣多能騎駿馬弄琱戈金鞍寶鈇精神出
倚笛新翻水調歌

隴頭一斷氣長秋舉目蕭條總是愁祇為征人多下淚

年年添作斷腸流

細草河邊一雁飛
黃龍關裏掛戎衣
為受明王恩寵甚
從事經年不復歸

昨夜邀歡出建章
今朝徵賞度昭陽
傳聲莫閉黃金屋
為報先開白玉堂

日晚笳聲咽戍樓
隴雲漫漫水東流
行人萬里向西去
滿目關山空自愁

千年一遇聖明朝
願對君王舞細腰
乍可當熊任生死

誰能伴鳳上雲霄

涼州歌四首

漢家宮裏柳如絲上苑桃花連碧池
聖壽已傳千載酒天文更賞百僚詩

朔風吹葉雁門秋萬里煙塵昏戍樓
征馬長思青海北鳴笳夜聽隴山頭

三秋陌上早霜飛羽獵平田淺草齊
錦背蒼鷹初出按五花驄馬餵來肥

鴛鴦殿裏笙歌起
翡翠樓前出舞人
喚上紫微三五夕
聖明萬壽一千春

突厥三臺

雁門山上雁初飛
馬邑欄中馬正肥
昨日山西逢驛使
殷勤南北送征衣

蓋羅縫二首

秦時明月漢時關
萬里征人尚未還
但使龍庭飛將在
不教戎馬度陰山

金史四八八卷五十八
音書杜絕白狼西桃李無顏黃鳥啼寒雁春深歸去盡
出門腸斷草淒淒

雙帶子

私言切切誰人會
海燕雙飛繞畫梁
君學秋胡不相識
妾亦無心去採桑

渭州

亭亭孤月照行舟
寂寂長河萬里流
鄉國不知何處是
雲山漠漠使人愁

水鼓子

雕弓白羽獵初回
薄夜牛羊復下來
夢水河邊秋草合
黑山峰外陣雲開

鍾西二首

天邊物色更無春
祇有牛羊與馬羣
誰家營裏吹羌笛
哀怨教人不忍聞

歲去年來拜聖朝
更無山闕對溪橋
九門楊柳渾無半
猶自千條與萬條

雜詩

無名氏

青天無雲月如燭
露泣梨花白如玉
子規一夜啼到明
美人獨在空房宿

空賜羅衣不賜恩
一燠香後一消魂
雖然舞袖何時舞
長對春風挹淚痕

不洗殘粧並繡牀
却嫌鸚鵡繡鴛鴦
回針刺到雙飛處
憶着征人淚數行

眼想心思夢裏驚
無人知我此時情
不如池上鴛鴦鳥

雙宿雙飛過一生

一去遼陽繫夢魂
忽傳征騎到中門
紗窻不肯施紅粉
徒遣蕭郎問淚痕

鶯啼露冷酒初醒
晝樓西曉角鳴翠羽
帳中人夢覺
寶釵斜墜枕函聲

滿目笙歌一段空
萬般離恨總隨風
多情為謝殘陽意
與展晴霞片片紅

兩心不語暗知情
燈下裁縫月下行
行到堦前知未睡

金少正
卷五十八
夜深聞放剪刀聲

近寒食雨草萋萋着麥苗風柳映堤一是有家歸未得
杜鵑休向耳邊啼

洛陽才子鄰簫恨湘水佳人錦瑟愁今昔兩成惆悵事
臨邛春盡暮江流

浙江輕浪古悠悠望海樓吹望海愁莫怪鄉心隨魄斷
十年為客在他州

數日相隨兩不忘郎心如妾妾如郎出門便是東西路

把取紅牋各斷腸

無定河邊暮笛聲
赫連臺畔旅人情
函關歸路千餘里
一夕秋風白髮生

舊山雖在不關身
且向長安過暮春
一樹梨花一溪月
不知今夜屬何人

花落長川草色青
暮山重疊雨冥冥
逢春便覺飄蓬苦
今日分離一涕零

萬首唐人絕句卷五十八